

Date – 21/01/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Chief Minister Pu Lalduhoma hovin Mizoram Pro - Active Governance & Timely Implementation (Mi-PRAGATI) meeting hmasa ber vawiin khan neih a ni.
2. Chakma Autonomous District Council, CADC-ah ziak leh chhiar thiam awm zat, Literacy Rate tih chhuah tharah zaa 61.03 an awm.
3. Sawrkar laipui chuan Atal Pension Yojana chu kum 2030-31 thleng hman turin a pawtsei.
4. Chief Election Commissioner Gyanesh Kumar chuan ramchhunga booth level officer te chu mipui rorelna democracy-a lungphum pawimawh tak an ni a ti.

<><><>

Mi-PRAGATI

Chief Minister Pu Lalduhoma hovin Mizoram Pro - Active Governance & Timely Implementation (Mi-PRAGATI) meeting hmasa ber vawiin khan neih a ni a.

Mi-PRAGATI Member Secretary, Pu Khilli Ram Meena, Chief Secretary chuan PRAGATI chu state chhunga hmasawnna hnathawh lian te vil a, harsatna an tawhte chin fel dan dappuitu tur leh a tul anga department hrang hrang thawhhona tichak tura din a ni a. Mipuite tana rawngbawlina tam zawk, langtlang leh rang zawk kalpuina tur a ni, a ti.

He meetingah hian sorkar hmalak mek thlan chhuah bikte report ngaihtlak niin harsatna an tawh mekte chipchiar takin an sawi hova, a chin fel dan tur pawh an duang zel a ni.

He hunah hian Aizawl Western Side Bypass Road Hnathawk mek report an ngaithla a, an hna thawh meka harsatna awmte leh a chinfel dan tur te an sawi a.

Chief Minister chuan, Aizawl Western Side Bypass road laih meka leivung paih dan fel lo chu chak taka bawhzui turin a mawhphurtute a hrilh a. Mizoram hmun danga NHIDCL kawngpui laihah pawh chutiang bawkin leivung paihna a fel faiin dan ang thlapa kalpui zel a ni tur a ni, a ti.

Vairengte - Sairang 4 lane National Highways laih mek pawh sawi hovin, harsatna awm hrang hrangte tarlan a ni a. A bawhzui dan tur an rel a, Vairengte -

Sairang inkar kawngpui awmsa, thawm thatna kalpui mek pawh NHIDCL lamin report an pe a. Chak taka hmalak a nih thu an tarlang.

Swadesh Darshan 2.0 hmanga Thingsulthliah Conference sak mek leh Unity Mall sak mek report pawh pek niin chak taka umzui zel a nih thu tarlan a ni.

Mi-PRAGATI hi nikum August thlaa din a ni a. Member te chu Principal Secretary, Secretary leh Deputy Commissioners te leh state chhunga central sorkar department / agency head te an ni.



MIZORAM RAISING DAY

Mizoram Police te chuan an din champhaphak, Raising Day vawi 54-na chu vawiin khan an lawm.

Vawiina Police Headquarters, Aizawl GS Arya Mess-a Mizoram Police Raising Day vawi 54-na lawmnaah, DGP Pu Sharad Agarwal chuan a tira tlawm tea bul tan Mizoram Police chu ram pum leh mipuite inngahna kulhpui an lo ni ta chu ropui a tih thu a sawi a. Kum 1972 ata tawh vawiin thlenga Mizoram boruak inlumlet chhovah Mizoram Police chu ralmuanna thlentu an ni tih sawiin, chung hun inlumlet mil zela mipuite inngahna an nih theihna bul chu thawktute thawhrimna, chhelna leh inpekna zar a ni a ti a.

Pu Agarwal chuan kum kalta khan ruihtheihthil dona kawngah thubuai 319 ziah luh a nih thu leh a kaihhnawihah mi 483 man an nih thu sawiin, Mizoram Police chuan tunlai thiamna changkang ber berte hmanga ruihhlo do chu an chhunzawm zel tur thu leh Demand Reduction leh Harm Reduction lam pawh an uar zual dawn a ti a, DGP chuan mipuite’n awlsam zawka online hmanga FIR an theh luh theih nan Police Station zawng zawngah CCTN bun an tum tih sawiin, mipuite leh thawktute tanrualna zarah nikum November ni 19 khan Mizoram chu 18th Urban Mobility India-ah chawimawina hlan a ni a, Mizoram Police-te chu infiamna kawngah pawh an duai loh thu leh ram pum leh khawvel pum huap pawha Mizoram leh Police-te tihmingthatu an nih thu a sawi bawk a ni. He hunah hian Police chawimawina hrang hrang sem a ni a, kum 2025-a Police Station tha berah Vaivakawn Police Station thlan a ni a, Mizoram Police Unity Band ten rimawi tumin hun an khar a ni.

Kum 1972 January ni 21 khan Assam Sorkar hnuaia Mizo District chu Union Territory-ah hlankai a ni a, Mizo District-a Assam Police awm mekte chu Mizoram Police-a leh nghal an ni a. Mizoram UT sawrkar thara IGP hmasa ber Pu I.J Verma, IPS chuan kum 1972 January ni 21 khan IGP Office a luah tan a, hemi ni hi Official-a Mizoram Police Raising Day atana pawm a ni zui ta a ni.

Vawiin vek khan Lunglei Luangmuala 2nd Battalion Mizoram Armed Police (MAP) te chu pawl 5-ah inthenin Mizoram Police Din cham pual hian Lunglei khawpui chhung hmun hrang hrangah faina hnatlang neiin, khawlaia bawlhhlawh an char fai a ni.



MPCC PRESS CONFERENCE

Congress Party chuan ZPM sawrkar chuan tunhnai tualchhung inthlanah an chakloh avangin AMC inthlan a hun taka buatsaih an tumlo sa an ti.

Vawiina thuthar thehdarhtute an kawmna ah Mizoram Pradesh Congress Committee Spokesperson Dr Lallianchhunga chuan ZPM Sawrkar chuan Dampa by-election an chak loh avang leh LADC inthlana pathumna an nih avangin AMC inthlan a hun taka neih an duhlo tih a sawi a. AMC term a ral hnu vekah buatsaih an tum chauh chu hriatthiam harsa an tih thu an sawi a, AMC inthlan buatsaih tura harsatna lian tham awm an hrelo tih sawiin term dinglai thiat a, AMC enkawltu tur

Administrator ruat ngai hiala inthlanna tih khawtlai chu Democracy kalphung palzutna ah an ngai tih sawiin ZPM chuan tunhnai inthlan an chakloh avangin AMC inthlan chu an duh hrihlo nia an ngaih thu a sawi.

Dr Lallianchhunga chuan AMC inthlan buatsaihna tur leh AMC sorkar thar din a nih theihna atana tih tur tul ang ang chu SEC hian a peih vek tawh a ti a, AMC term kal mek chu kumin March ni 1 ah a tawp dawn avangin State Election Commission chuan hmeichhe ward tur chu nikum 2025 May ni 30 ah a tifel tawh tih sawiin AMC Final Electoral Roll pawh kumin Jan 7 khan tar chhuah a ni tawh a ti a, inthlan tih khawtlaina chhan an sawi chu state sawrkar chinfel theih vek ani tih sawiin AMC inthlan a hun taka an buatsaih duhlo chu mipui zahlohna ani tih sawiin a rang lama inthlan buatsaih vat turin an phut tih a sawi.

<><><>

CADC

Chakma Autonomous District Council, CADC-ah ziak leh chhiar thiam awm zat, Literacy Rate chu zaa 61.03 a ni.

CADC-a Adult Education Department chuan nikum 2025 October thla atanga kumin January thla inkarah khan CADC huamchhunga Village Council 88-ah te ziak leh chhiar awmzat zawinna, literacy survey kimchangtak an nei a, he survey hi hlawm pahnihah then niin, naupang kum 7 atanga kum 14 inkar leh kum 15 chin chunglamah te then hran a ni a, he survey hna hi tualchhunga NGO aiawhte leh school hrang hrang Headmaster te thawhpaina hnuaiah neih a ni a, CADC pumpuia ziak leh chhiar thiam awm zat, Literacy Rate chu zaa 61.03 a ni tih an hmuchhuak a ni.

He survey hi CADC Adult Education Department in CADC huamchhunga ziak leh chhiar thiam awm zat zawinna changtlung tak an neih hmasak ber a ni a, survey behchhan hian Adult Education Department chuan kum 2026 CADC Literacy Chart an buatsaih a, vawiin khan CADC Executive Secretary, Pu Pronit Bikash Chakma chuan Literacy Chart hi Kamalanagar-ah a tlangzarh a, survey bakah hian Adult Education Department chuan CADC huamchhunga khaw thlan bikah te mipuiten thiamna leh zirna ngaihpawimawh nachang an hriat theih nan, ziak leh chhiar chungchanga inhrilhriatna, literacy awareness campaign an kalpui bawk a ni.

CADC Adult Education Department hi kum 1996 khan din a ni a, CADC huamchhunga ziak leh chhiar leh zirna lam tih hmasawn hna an thawk thin a ni.

<><><>

RD MINISTER

Rural Development & Administration Department Minister Prof. Lalnilawma chuan a office chamber atangin Video Conference-in MGNREGA hnuaia Project Rotling hnathawh hrang hrangte leh hmasawn dante thlirhona chu RD&AD official-te a neihpui a.

Minister chuan Project Director-te leh BDO-te chu an hna a hun taka zo thei turin theihtawp chhuah turin a chah a. RD&AD kaltlanga hnathawh reng reng a tha tur a ni a, thingtlang mipuite tan malsawmna ni thei turin an hna an thawk tur a ni, a ti a. Project Rotling hi a hming ang ngeiin, thingtlang khuate tan rotling a nih theih nan theihtawp chhuah zel turin officer-te a fuih a ni.

Project Rotling hi khawtlang mamawh rotling siamna tura RD&AD-in Project Director, DRDO-te leh BDO-te tan inelna a siam hmanga thlan chhuah a ni a. Short

Term Project atan Project 5, Medium Term Project atan 5 leh Long Term Project atan 5 theuh thlan chhuah an ni.

He thlirhona neih-ah hian Project enkawltu Project Director-te leh BDO ten an project rotlingte sawifiahin, harsatna an neihte leh hmalak ngaite sawiho nghal a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

OIL PALM

Kolasib district Oilpalm Growers Association hruaitu ten vawiin khan Saibual zau Oilpalm link road PCC Flooring tih mek a hmunah an enfiah.

Saibual zau hi Kolasib District a Oilpalm chinna Cluster pawimawhtak niin, Fur lain kawng a that loh thin avangin an Oilpalm thiarchhuahna ah harsatna an tawk nasa thei hle a, chuvangin Agriculture Department hmalakna in RIDF NABARD loan sum hmangin PCC Flooring 2 km siam niin cheng nuai 93 senga siam a ni a, kumin February ni 20 a zawh tura ruahman ani.

Vawiin Kolasib District Oilpalm Growers Association hruaitu ten an tlawh lai hian hna an thawk meka, an hna thawh a tha thawkhat ni a a lan lain a then laiah an lung hman te chu a thalo nia hriain, Lung tha hmang turin contractor chu an ngena, Hetianga Oilpalm zau panna kawng thatak mai sorkar hmalakna a siam ani hi Kolasib district Oilpalm Growers Association hruaitu te chu an lawm hle a ni. DAO Pu Joseph Lalnuntluanga'n Oilpalm hruaitu te hi a tawiawm a ni.

<><><>

FISHERIES MINISTER

Fisheries Minister Pu Lalthansanga'n Mizoram zaa 30 vel tal sangha-a chawm tum thei tura hma la turin Fisheries Department a thawktute a chah.

He thu hi vawiina Fisheries Department hnuai a thawktute kumthar inhlantharna leh infuihtharna hun Directorate of Fisheries, MINECO-a a hmanpuinaah sawiin, Pu Lalthansanga chuan Fisheries Department in ZPM Sorkar hnuai a hmasawmna hrang hrang an neih chu lawmawm atih thu sawiin Mizoram zaa 30 vel tal sangha a chawm tum thei tura hmala turin Fisheries Department a thawkte a chah a, thawktute chu tunlai thiamna thar hmang tangkai thiam tur leh inzir belh tura chahin Sangha ah Mizoram a intodelh theih nan a tan la zual turin thawk tute a fuih a, Fisheries Minister chuan thawktute chu an nitin eizawmna chu an rawngbawl a ni tih hria a, taima taka thawk a, loneitute ngaihsak leh zual turin leh Kalphung thar Mipui sorkar a nih ang ngei a, mipui te ngaihsak leh zual a, rinawm taka an hna thawk turin a fuih baw a ni.

Byte : Minister Pu Lalthansanga

Inhlantharna hun ah hian District hrang hrang a District Fisheries Development Officer te leh Fisheries Extention Officer te bakah Directorate leh

Secretariat a thawktute an tel a, he hunah hian Fisheries Department hnathawh kal mek leh lo la awm tur te bakah, Fisheries Department hmasawwna tur Project leh Scheme (CSS) hrang hrang te Powerpoint Presentation hmangin inzirtir a ni a, District hrang hrang a thawktute dinhmun leh hmasawwna bakah staff indaihlohna avanga harsatnate tarlan a ni bawk a ni.

<><><>

ATAL PENSION YOJANA

Sawrkhar laipui chuan Atal Pension Yojana chu kum 2030-31 thleng hman turin a pawtsei. He scheme hi kum 2015 May thlaa bul tan niin unorganised sector lama inhlawhfate tan kum upat hnua pension an hmuh theihna tur a ni a. Vawiina Prime Minister Narendra Modia kaihhruaia Union Cabinet thukhawm chuan Atal Pension Yojana hi pawhsei a remti ta a ni.

<><><>

CEC

Chief Election Commissioner Gyanesh Kumar chuan ramchhunga booth level officer te chu mipui rorelna democracy-a lungphum pawimawh tak an ni a ti. Vawiina International Conference on Democracy and Election Management(IICDEM) 2026, New Delhi-a hawwnaah he thu hi sawiin Pu Kumar-a chuan India chu democracy hringtu anih thu sawiin electoral roll dik tak hman a, a tel tur diktak tel vek chu mipui rorelnaa pawimawh tak a nih thu a sawi.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmukhawm hlawhtling takin a nei. He programme hi PM Modian kum 2015 a bul a tan atangin sawrkhar inrelbawlina leh hnathawh dana inthlak danglamna tam tak a thleng a. Sawrkhar hnathawkte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawwna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkhar thutlukna pawimawh tak takah nasa takin a pui a, hmasawwna hna thawh tikhawtlai thinte chin fel niin sawrkhar hnathawkte rintlak lehzuala siam an ni. PRAGATI hnuaia hlawhtling project zingah hain Andhra Pradesh-a AIIMS Mangalagiri hi a tel a. Ram acre 183.11a zauah khum 960 awm theihna turin he damdawiin hi ruahman a ni a. Sum sen tur pawh cheng vaibelchhe 1618.23 a ni a. Kumtin MBBS zirlai 125 lak theihna tur a ni bawk. Kum 2018 khan Government Siddhartha Medical College, Vijayawadka-ah campus lailawk siam a ni a. Hun engemawchen harsatna hrang hrang avanga project zawh hunah zawh theih anihloh avangin PRAGATI hnuaiah hmalak a ni a. Kum 2023 January ni 31 khan peih fel niin 2024 February ni 25 ah Prime Minister Modian ropui takin a hawng a ni.

<><><>